

Dua pesilat sertai senarai 'atlit emas' terima ganjaran



GANJARAN JADI PERANGSANG: Pesilat Nurzuhairah (tengah) dan Sheik Farhan (dua dari kiri) menyertai rakan atlit lain termasuk (dari kiri) Mark Leong (lungsur air), Michelle Sng (atletik) dan Muhammad Jari Goh Ali Akbar Goh (bowling) di majlis penyampaian habuan Program Anugerah Jutaan Dolar (MAP) malam tadi. – Foto M.O. SALLEH

► **ANWAR YAHYA**
anwar@sph.com.sg

BUKAN mudah baginya mengetepikan acara tanding yang sememangnya menjadi kegemarannya sejak mula berjinak-jinak dalam silat semasa berada di bangku sekolah rendah.

Namun, pesilat muda Nurzuhairah Mohammad Yazid terpaksa mengambil keputusan yang sukar itu – mengundurkan diri daripada acara tanding agar beliau dapat memberikan tumpuan pada dua acara seni – tunggal dan regu wanita – di temasya Sukan SEA Kuala Lumpur baru-baru ini.

Segala pengorbanannya ternyata berhasil apabila gadis berusia 19 tahun ini muncul sebagai penyumbang pingat emas kedua pasukan silat negara di temasya sukan KL melalui acara seni tunggal – dengan satu lagi emas pula dimenangi Sheik Farhan Sheik Alau'ddin melalui acara tanding

Di atas kejayaan penuh manis itu, Nurzuhairah dan Sheik Farhan menyertai senarai 101 'atlit emas' Singapura di Sukan SEA KL itu yang menerima ganjaran di majlis sempena Program Anugerah Jutaan Dolar (MAP) Majlis Olimpik Kebangsaan Singapura (SNOC)-Kumpulan Lembaga Tote yang berlangsung di Orchard Hotel Singapore malam tadi.

Keseluruhannya ganjaran bernilai \$670,000 disampaikan kepada pemenang pingat emas di temasya sukan itu di mana Team Singapore mencatatkan pencapaian terbaik – 57 emas, 58 perak dan 73 gangsa – bagi temasya Sukan SEA yang dianjurkan di luar negara.

"Sebenarnya saya agak terkejut dengan pingat emas ini kerana acara saya selalunya dikuasai pesilat dari Indonesia," ujar Nurzuhairah semasa dihubungi petang semalam.

"Lainnya saya baru mengalihkan tum-

puan pada acara tunggal awal tahun ini... jadi, saya bersyukur dapat menyumbang kepada kejayaan pasukan silat dan juga Team Singapore.

"Segala kejayaan ini akan menjadi motivasi saya agar terus mempertingkatkan prestasi apabila tampil pula di temasya Sukan Asia Indonesia pada tahun depan," tambah anak sulung keluarga tiga beradik itu.

"Rakan emas'-nya, Sheik Farhan, bagaimanapun bukanlah nama asing dalam sukan itu. Selain bergelar juara dunia berganda dan diiktiraf Anugerah Atlit-Pelajar Lelaki Terbaik baru-baru ini, Sheik Farhan turut menjuarai Kelas J (90-95kg) di Kejujangan Pencak Silat Asia yang berakhir di Chungju, Korea Selatan, bulan lalu.

Kedua pesilat itu menerima habuan \$10,000 setiap seorang (20 peratus perlu disalurkan semula kepada persatuan sukan nasional atau NSA masing-masing bagi

menyokong dana pembangunan dan latihan).

Dengan pemenang pingat emas acara individu menerima \$10,000 (\$5,000 dihadkan bagi dua acara individu lain), \$15,000 bagi emas acara berpasukan dan \$30,000 bagi emas sukan berpasukan, perenang negara yang diketuai jaguh Olimpik Joseph Schooling serta tiga perenang bersaudara – Quah Zheng Wen, Ting Wen dan Jing Wen – muncul antara penerima habuan terbesar kali ini.

Buat julung-julung kalinya juga, pasukan bowling, golf, kriket dan squash lelaki negara tampil menerima ganjaran masing-masing menyusuli kejayaan bersejarah mereka di KL.

Berucap di majlis semalam, Speaker Parlimen yang juga presiden SNOC, Encik Tan Chuan-Jin, mengalu-alukan pencapaian penuh inspirasi atlit negara di samping melahirkan penghargaannya kepada kumpulan yang sentiasa memberikan sokongan.

1. Joseph Schooling (renang): \$31,250 – tiga emas individu dan tiga emas acara berganti-ganti

2. Quah Zheng Wen (renang): \$31,250 – tiga emas individu dan tiga emas acara berganti-ganti

3. Quah Tin Wen (renang): \$26,250 – dua emas individu dan tiga emas acara berganti-ganti

4. Quah Jing Wen (renang): \$26,250 – dua emas individu dan tiga emas berganti-ganti

5. Debbie Soh (renang berirama): \$19,160 – satu emas individu dan dua emas berpasukan

6. Vivian Rhamanah (squash): \$11,250 – dua emas berpasukan (jumbo lelaki dan berpasukan lelaki)

7. Sheik Farhan Sheik Alau'ddin (silat): \$10,000 – satu emas tanding individu

8. Nurzuhairah Mohammad Yazid (silat): \$10,000 – satu emas seni tunggal

9. Amita Berthier (lawan pedang): satu emas individu 'foil'

10. Lau Ywen (lawan pedang): \$10,000 – satu emas individu 'sabre'

11. Calvin Sim (lumba basikal): \$10,000 – satu emas individu 'omnium'

11. Skuad golf lelaki: \$15,000 (dibahagi empat pemain) – satu emas acara berpasukan

12. Pasukan kriket lelaki: \$30,000 (dibahagi 15 pemain) – satu emas sukan berpasukan

13. Pasukan polo air lelaki: \$30,000 (dibahagi 13 pemain) – satu emas sukan berpasukan

Nota: Penerima perlu salur 20 peratus daripada jumlah habuan kepada persatuan sukan nasional (NSA) masing-masing bagi tujuan pembangunan dan latihan.

PROGRAM ANUGERAH JUTAN DOLAR SNOC

Sukan

Berita Harian | Jumat, 6 Oktober 2017